

տի գար նա: Ճաշի ժամից յետոյ: Արդեօ՞ք կը վերջանար այդ ճաշոյա ժամը, թէւ կեսօրից շատ էր անցել, եւ մենք սկսեալ առաւօտից ոչինչ կերած չէինք:

Դրսում մորիկը դեռ չէր դադարել: Կատաղի քամին տակաւին մռնչում էր: Ներս մտաւ նաւաստին, անապատումը իր ուղտը կորցրած արաքի նման, տխուր եւ յուսահատ դեմքով: Երբ ես սկսեցի մխիթարել, նա պատասխանեց.

— Ես այնքան չեմ ցաւում, որ նաւակս կորցրի, այլ մտածում եմ, թէ ինչպէ՞ս պետք է գիշերը անցկացնեմ այստեղ:

— Ինչո՞ւ:

— Կը տեսնեք, թէ որպէս պիտի տանջեն մեզ...

Նա չբացատրեց, թէ այդ տանջանքը ինչո՞ւմ պետք է լինէր, բայց նա էլ ինձ նման սկսեց գանգատող իր քաղցածութեան մասին:

— Ինչո՞ւ դուք Ծովիկի դրած հաւերը նետեցիք ծովը, — սկսեցի ես յանդիմանել նրան:

— Դու կարծում ես, եթէ մնացած լինէին, կարո՞ղ էիր ուտել, — ասաց նա, ուղիղ իմ աչքերի մէջ նայելով: — Այստեղ, եղբայր, միս չեն ուտում, եւ ուխտաւորներին արգելւած է իրանց հետ միս բերել, որ վարդապետների ախորժակը չգայթակղեցնեն:

Ինչ բանի դեմ բողոքում էր Եզնիկը հինգերորդ դարում, նոյն բանի դեմ բողոքում էր անկիրթ նաւաստին այժմ:

— Ուրեմն մատաղներ չե՞ն մորթում այստեղ, — հարցրի նրանից:

— Այդ կղզու վրայ անկարելի է արին թափել: Մատաղները մորթում են «դրսի տանը. այնտեղ պատրաստում են եւ այստեղ ուտում են: Այդ լինում է տարին մի անգամ միայն, երբ բազմաթիւ ուխտաւորներ են գալիս:

«Դրսի տունէ կոչում էր նաւաստին կղզու հանդէպ՝ ցամաքի վրայ գտնող տունը, որ պատկանում էր անապատին: Այդ տունը ջրային ճանապարհով կղզուց մէկ ժամու կամ աւելի պակաս հեռաւորութիւն ունէր: Այնտեղ էր զետեղւած վանքային բոլոր տնտեսութիւնը: Անապատում ուրիշ ոչինչ չէին շինում, միայն աղօթում էին ու ճգնում: Իսկ այնտեղ գործ կար, որի մասին պիտի խօսեմ, երբ դուրս կը գանք «դրսի տունը»:

Վերջապէս ներս մտաւ արեղան եւ հրաւիրեց մեզ սեղանատունը: Դա մի ընդարձակ սենեակ էր, որի երկարութիւնը չորս անգամ աւելի կը լինէր, քան թէ լայնութիւնը: Սենեակի երկարութեան չափով, մէջտեղում շինած էր քարեայ անշարժ սեղանը, որի երկու կողմից զուգահեռաբար ձգւում էին